

Date – 12/08/2025
Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. India ram zalenna champha vawi 79-na lawmna kal zelah hnam puanzar chawimawina leh mipui hnena thlen beihpui, Har Ghar Tiranga chu District hrang hrangah neih mek a ni .
2. Mizoram-a khuarel chhiatna thleng thin leh a kaihhnawih hnarsatna sutkian dan tur enin National Disaster Management Authority hotuten Mizoram an rawn tlawh mek.
3. Prime Minister Narendra Modia leh Ukraine President Volodymyr Zelensky te chu nimin khan telephone hmanga inbiain thil pawimawh tak tak an sawidun
4. Parliament chuan nimin khan Merchant Shipping Bill 2024 a pass.

<><><>

HAR GHAR TIRANGA

India ram zalenna champha vawi 79-na lawmna kal zelah hnam puanzar chawimawina leh mipui hnena thlen beihpui, Har Ghar Tiranga chu District hrang h rangah neih mek a ni a,

Champhai DC Office chuan Har Ghar Tiranga pual hian nimin khan bike rally a buatsaih a, Champhai Bawrhsap Pu Mohammad Aaquib chuan a vailiam.

He hunah hian Buffalo Riders, 04 Riders leh 04 Girls te sawm bik an ni a, pisa hrang hranga thawk te an tel bawk a ni. Bike leh scooty-ah hian national flag tar a ni a, New Champhai atangin Kahrawt Volleyball Court thleng an khalh a ni.

Kolasib DC Office tual zawlah Kolasib Har Ghar Tiranga Campaign hi nimin vek khan neih a ni bawk a. Hemi pual hian kawngzawh ‘Tiranga Yatra’, mimal in tina India hnam puan zar tura au hla ‘Har ghar tiranga’ leh thutiam sawi rualna hun hman a ni.

Mizoram Ex-Servicemen League Sub-Hqrs. Kolasib President, Pu Lalenglina kaihhruaiin Har Ghar Tiranga thutiam leh aurualna neih a ni a. He hunah hian Sawrkar Official-te, Sainik Mizoram Ex-Servicemen League Sub-Hqrs. Kolasib Member-te leh Kolasib khaw chungga High School thlan bikte an tel a ni.

Kan corr report lo ngaithla ang.

Har Ghar Tiranga pual hian vawiinah Aizawl Vanapa Hall-ah Tiranga Mela leh Tiranga concert neih a ni dawn a, hetah hian exhibition, handicrafts, handloom leh food court te hawn a ni dawn a ni.

Art & Culture Department Joint Director, Pu F. Lalthanmawia chuan Ministry of Culture hmalakna a nih angin, Art & Culture Department chu nodal department an ni a ti a, tun dinhmunah Aizawl tih loh Mizorama district hrang hrangah te DC kaihhruaina hnuaiah exhibiton leh thil dang dang ti turin hma an la mek a ti a, Aizawl district-ah pawh hmun 25-ah exhibiton neih tur zinga hmun 24 an nei fel tawh tih sawiin, school leh zirna in hrang hrang baka bazar hmunah te an nei tawh a ti.

<><><>

TEACHERS DAY TO BE OBSERVED

School Education Minister Dr. Vanlalhlana hovin State Working Committee for Celebration of Teachers' Day nimina Aizawla thukhawm chuan kumin Teachers' Day September ni 5a lawm dan tur chungchang an sawi ho a,

Dr. Vanlalhlana chuan zirtirtute pawimawhzia sawiin, naupang chu a tet te atanga zirtirtu thain zaidawh tak leh awmze neia a enkawl chuan a hlawhtlinna kawng a awlsam bik tih zirmite'n an fiah tawh a ti a. Sawrkar hnuaia zirtirtute tana hamthatna hrang hrang tarlangin, insurance tih pawimawhzia a sawi bawh a. Zirtirtute Ni ropui tak leh hlawkthlak taka hman a nih a, zirtirtu hna chawisan a lo nih zel theih a beisei tih a sawi a ni.

Kalkhawmte chuan Teachers Day uar thei ang bera hman an rel a, zirtirtu chawimawina hun hman te bakah Akashvani leh Doordarshan-a nena thawhho dan tur te an sawiho zingah hian a tel a ni.

<><><>

CM

Chief Minister Pu Lalduhoman nimin khan a office-ah UD & PA officialte kawmin, Thenzawl Peace City Master Plan siamtu tur zawinna kalpui meka an thlen chinte a sawipui a. Chief Minister hi Pu Vanlaldina Fanai, Secretary to CM in a tawiawm a ni.

UD & PA Secy Pu Lalmalsawma Pachuau chuan, thla hlui July ni 22 khan Master Plan siamtu tur zawinna hmahruai Request for Proposal for selection of Consultant an tihchhuah thu leh company lian tak tak sawm leh pariatten an rawn ngaihven thu a tarlang a. Heng Pre Bid Queries rawn nei zingah hian khawvel huapa company thate pawh an tel thu a tarlang.

Kan corr report lo ngaithla ang.

Ruahman anga thil a kal chuan Thenzawl Peace City Master Plan siamtuu tur thlanna hi thla thar September thla tir hian a neih fel hman tum a ni a, October thla atangin hna an tan ang a, tun sorkar kum chhungin Master Plan pawimawh zual chu peih fel hman an tum ang.

Sorkar chuan mipui nuai 10 vel chen theihna tur khawpui changkang - Thenzawl Peace City din tumin hma a la mek a. Ministry of Housing & Urban Affairs (MoHUA) chuan Master Plan siamna tur cheng vbc 10 a pe tawh a ni.

<><><>

NDMA VISIT

National Disaster Management Authority (NDMA) hotute chu Mizoram-a khuarel chhiatna thleng thin leh Mizoramin chhiatna a hmachhawn dan chungchangte belchiang tur leh a tul anga hmalak dan turte rel turin Mizoram-ah an lokal a,

Nimin khan Aizawl leh Lengpui inkar (Pukpui) kawnga lung tlak thinna hmun an tlawh nghal a; Pukpuiah hian kumin April ni 28 khan lung tla-in Pu Lalrinliana, Falkland-te chhungkaw chuanna Motor delhin, amah bakah a nupui leh an fanu ten nunna an lo chan phah tawh a ni.

Ruahman dan chuan NDMA hotute hian vawiinah District thuneitute leh mi pawimawh dangte an kawm dawn a, State Emergency Operations Centre, Aizawl an tlawh nghal ang. Naktukah Champhai District leh Khawzawl District-a khuarel chhiatna thlen nasat zualna hmunte tlawh lehin District Emergency Operations Centre-te an tlawh nghal bawh dawn a ni.

<><><>

BJP MIZORAM

Palak Bialtu MLA Pu K. Hrahmo-a'n Mizoram chu Central Base-a a kal ve theih hunah kawng hrang hranga harsatna a tawh te a kiam a rin thu a sawi.

Nimina BJP Mizoram Headquarters-a Political Session-a thu a sawinaah, Palak Bialtu MLA Pu K. Hrahmo chuan tun hunah hian National Party, BJP atang lo chuan hmasawinna a awm thei lo tih a chiang tawh hle a ti a, MNF chuan NDA an zawm inti chung siin, NDA tak takah an inhnimphum duh lova, MNF te'n Sorkarna an siam lai khan NDA-ah awm tak tak ni se chuan, Mizoramin khatianga harsatna kha a tawh a rinawm loh a, SEDP atanga sem tur cheng nuai thum (3 lakhs) pawh kha an neih a rinawm a ni ti. Tun Sorkar-ah pawh NDA-a tel tura Central hruaitute'n ZPM an dawr lai khan an zawm duh lova, vawiinah chuan chumi rah chu an seng mek a, ZPM chu issue base a an kal ang bawkin Central sorkar pawhin issue base in Mizoram an enkawl niin a lang a ti.

Pu Hrahno chuan BJP chu a lian tawh hle a, Autonomous District Councils ADC-ah te phei chuan party dangten an huphurh rawn tawh a ti a, tunhnaia Chakma Autonomous District Council By-election campaign in Chawngte a an kal ve thu sawiin, Party pathum- BJP, ZPM leh MNF inbeihna a ni a, an inbeih tawh em avangin boruak a tang hle a ti a, BJP chu chak ngei tura an rin laiin, inthlan result-ah BJP chu vote 9 chauhin an chak zo lo a, hei hi MNF chuan ZPM an vote pui vang a ni a ti a, BJP chu Pathian zarah an lian tawh hle a, ADC-ah te chuan huphurh ber party an ni tawh a, hei vang hian party dangten an beihrawn a, BJP chu beihrawn tlak party an ni ve tawh tih a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MNF PR

MNF General Secretary, Ex-Minister ni bawk Pu Lalrinawma'n hmasawn a tul rualin, hnam phumbo zawnga hmasawn a hlauhawm a ti.

Nimina Mizo Hnam Runah Mizo National Front Chhung Inkhawm, hun hnihna Political Session-ah MNF General Secretary Pu Lalrinawma chuan thu sawiin, hmasawn a tul rualin, hnam phumbo zawnga hmasawn a hlauhawm em em a ni a ti a. Hnam humhim pawimawh zia hriain Remna thuthlung ah pawh India Danpuiah, MNF hotute remhriatna leh ngaihpawimawhna avangin, Mizo hnam ziarang leh sakhaw humhimna tur pawh telh a ni a. Ram leh hnam himna turin MNF party chu a sulsutu niin mawhphurhna huai takin a lak thin angin, a awmna apiangah tlanchhe lovin a la mek zel bawk a ni, a ti.

Pu Lalrinawma chuan, khawvelah humhalh loh hnam leh tawng tam tak a bo tawh a, a bo mek zel a, chutiang laka hnam himna tura chi nung tuhtu Pu Laldenga leh a hnungzuitute chi tuh Mizo Nationalism hi a duah chho zel dawn a. Chumi chhawmnun hna thawh chu tuna mi te hna pawimawh berte zing ami a ni, a ti bawk. Ex-Minister Pu Rinawma chuan, MNF in Independence a puan-kum 60-na champha lawm tura party inbuatsaihna leh hmalakna azarah, Mizote chu hnamah an harh thar leh zual a beisei thu a sawi a ni.

<><><>

PM MODI

Prime Minister Narendra Modia leh Ukraine President Volodymyr Zelensky te chu nimin khan telephone hmanga inbiain thil pawimawh tak tak an sawidun. President Zelensky hian PM Modi hnenah an ramchhunga harsatna thleng mek chungchang a hrilhfiah a. Pu Modia chuan buaina thleng mekah remna leh muanna kawng zawh thuai tura a duh thua sawi a. India chuan remna siam turin tanpui a inpeih reng tih a sawi a. Ukraine nen an inkar pawh siamthat zel a beisei thu a sawi bawk a ni.

<><><>

PARLIAMENT

Parliament chuan nimin khan Merchant Shipping Bill 2024 a pass. He bill hi Lok Sabha ah pass a ni tawh a, nimin khan Rajya Sabha ah pass a ni leh a. Merchant Shipping Act 1958 a thlak dawn a ni. He bill hmanh hian India in ramdang nena tuifinriat lama sumdawna tur inremna an siam leh inkaihhraina awmte sumdawng lawnglianten an zawm ngei theihna tura viltu tur dan a

ni a. Hei bakah hian India in lawng hmanga sumdawnna a kalpui mek tihhmasawnna tur dan a ni bawk.

Union Minister of Ports, Shipping and Waterways, Sarbananda Sonowal chuan dan hlui chuan ramin hmasawnna tur hmathlir a neihte a tihhlawhtling zo tawh lo niin a sawi.

<><><>

PMFBY

Union Minister for Agriculture and Farmers Welfare Shivraj Singh Chauhan chuan Pradhan Mantri Fasal Bima Yojana dawngtu loneitut nuai 35 chuangte hnenah cheng vaibelchhe 3900 a sem. Rajasthan-a Jhunjhunu atangin Pu Chouhana hian Direct Benifit Transfer kaltlangin he hamthatna dawngtute hnenah hian a sem a. He hunah hian Rajasthan Chief Minister Bhajanlal Sharma leh Union Minister of State for Agriculture Bhagirath Chaudhary te pawh an tel a ni.

<><><>